

## Shakkii Qiyaamaa Qulqulleessuf-Kutaa 1

### Description

Guyyaan Qiyaamaa shakkii akka hin qabne kutaalee darban keessatti irra deddebi'uun ilaalle jirra. Ammas, shakkii sheyxanni namatti darbu balleessu fi qulqulleessuf irra deebinee ni ilaalla. Guyyaan Qiyaamaa fi wantoonni Guyyaan san adeemsifaman wantoota gara fuundurraatti dhufanii fi geeybii ta'aniidha. Seenan darbe akkuma nuuf geeybi (nurraa dhokata) ta'ee, wanti gara fuundurraatti dhufus geeybi (nurraa dhokataadha). Garuu wanta dhokataa ykn fagoo kana akkamitti beeknaa? Wantoota kanniin karaa lamaan beekun ni danda'ama. Isaanis; mallattoolee fi odeefanno dhugaa (haqa) ta'eeni. Seenaa darbe irra caalaa isaa kan beeknun odeefanno. Akkasumas, mallatoolenis ni beekna. Fakkeenyaf, seenaa Kaabaa yoo fudhanne mallattoolee fi odeefanno kan beekkamuudha. Jalqaba Kaabaa kan ijaare Nabii Ibraahim (nageenyi isarratti haa jiraatu) ta'uu odeefanno dhugaatin ni beekna. Manni Kaabaa roga afre hanga ammaa jiraachuun isaa mallatoodha. Akkasumas, iddooleen seenaa bakka adda addaa jiran wanti tokko yeroo darbe keessa akka adeemsifame nutti akeeku.

Haaluma kanaan, Guyyaan Qiyaamaa gara fuunduraatti dhufu mallattoolee fi odeefanno dhugaa qaba. Kutaalee darbe keessatti mallattoolee Guyyaan Qiyaamaa dhiyaachu agarsiisan ilaalle jira. Fakkeenyaf, addeessi lamatti baqaqu, ibiddi hijaaz irraa bahu, zinaan baay'achuu, dubartoonni qullaa deemu, ajjeechan baay'achuu, miila duwwaa fi tiiksen ijaarsa ol dheeraa ijaaruf wal dorgomu fi kkf.

Odeefanno dhugaa Guyyaan Qiyaamaa agarsiisu immoo odeefanno Rabbiin irraa karaa Ergamtootatin haala kitaabatiin nu dhaqqabeedha. Odeefanno dhugaa kana Qur'aana keessatti arganna. Odeefanno kuni odeefanno shakkii fi sobni gonkumaa itti seenu hin dandeenyedha. Rabbiin caalaa eenyutu dhugaa dubbataa? Rabbiin ni jedha:

وَالَّذِينَ ءَامَنُوا وَعَمِلُوا الصَّالِحَاتِ سَكُنْدٌ خَلُهُمْ جَنَّتٍ  
 تَجْرِي مِنْ تَحْتِهَا الْأَنْهَرُ خَلِيلِينَ فِيهَا أَبْدًا وَعَدَ اللَّهُ حَقًّا وَمَنْ  
 أَصْدَقُ مِنَ اللَّهِ قِيلَا



“Isaannan amananii fi hojji gaggaarii hojjatan, fuunduratti Jannata laggeen ishii jala yaa'an isaan seensifna. Yeroo hundaa achi keessatti hafu. [Kuni] waadaa Rabbii haqa ta'eedha. **Namni dubbiidhaan Rabbirra dhugaa ta'e eenyu?**” Suuratu An-Nisaa 4:122

Gonkumaa Rabbiin caalaa kan dhugaa dubbatu hin jiru.

Ilmi namaa hanga fedhe dhugaa haa dubbatu, guyyaa tokko dogongoruun soba dubbachuu danda'a nama Rabbiin eege malee. Dogongorri kunis kan uumamu hanqinnaa beekumsaa fi dandeettiti. Ilmi namaa wanta hundaa tokko tokkoon waan hin beeknef ni dogongora. Akkasumas, wanta dubbate san dhugaa taasisuuf dandeettin isaa hir'uu waan ta'eef wanta san osoo bakkan hin gahin kufu danda'a. Rabbiin subhaanahu wa ta'aala hanqinnaa fi dadhabbinna kana hundarraa qulqulluudha. Beekumsi Isaa wanta hundaa kan haguugedha. Wanta darbee, kan ammaa fi wanta dhufu hunda tokkoon beeka. Akkasumas, wanta murteesse ykn jedhe bakkaan gahuu irratti dandeetti guutuu qaba. Kanaafu, *Rabbiin (subhaanahu wa ta'aala) beekumsi Isaa guutuu fi wanta hundaa kan marse waan ta'eef, Guyyaan Qiyaamaa yoom akka dhufuu fi maaltu akka adeemsifamu ni beeka. Akkasumas, waan hundaa irratti danda'aa waan ta'eef Guyyaa Qiyaamaa ni fida, wantoota Guyyaa san adeemsifamaniis bakkaan ni gaha. Kanaafu, eenyutu Rabbiin caalaa dhugaa dubbataa?*

Ilmi namaa wanta darbe namoota irraa odeefannoo argachuu danda'a. Garuu wanti gara fuunduratti dhufu takkaa mallattoon beekkama takkaa immoo odeefannoo dhugaa Rabbiin irraa ilma namaa dhaqqabeedhaani. Odeefannoos Rabbiin irraa dhufe ragaa hundarra cimaa Guyyaa Qiyaamaa agarsiisudha, Rabbiin yeroo hundaa dhugaa dubbataa waan ta'eef. Sababni kanaa, Rabbiin wanta hundaa kan beeku fi waan hundaa irratti danda'aadha. Kanaa gadittis ragaaleen biroo akka jiran kutaalee darban keessatti ilaalle jirra.

Sheyxanni ilma namaa jallisuu fi ibiddatti isaan naquuf ragaalee kanniin akka hin fudhannee fi Guyyaa Qiyaamatti hin amanne isaan taasisa. Ragaan warrooni Guyyaa Qiyaamatti kafaran ittiin morman takkattidha. Qur'aana keessatti:

وَإِذَا نَّلَىٰ عَلَيْهِمْ مَا يَنْتَنَا بَيْتَنَتِ مَا كَانَ حُجَّتْهُمْ إِلَّا أَنْ قَالُوا أَئْتُو أَبْشَابَاهُنَّا إِنْ

كُنْتُمْ صَدِيقِينَ ٢٥

“Yeroo keeyattooni (aayaatni) Keena ifa ba'anii isaan irratti dubbifaman, ragaan isaanii [kan ittiin morman], “Yoo kan dhugaa dubbattan taatan abbooti keenya fidaa.” Jechuu malee [wanta biraan] hin taane.” Suuratu Al-Jaasiyyaa 45:25

Ergamtooni ykn warrooni gara Islaamaa waaman (daa'iwan) Guyyaan Qiyaamaa amma hin jenneen. Garuu “gara fuunduraatti ni dhufa, amanuu fi hojji gaggaarii hojjachuun itti qophaa'aa” jedhaniin malee.

Rabbiin akkana jechuun mormii armaan olii deebisa:

قُلِ اللَّهُ يُحِبُّ كُلَّ شَمْسٍ يُعِيشُ كُلَّ شَمْسٍ يَجْمَعُكُمْ إِلَى يَوْمِ الْقِيَمَةِ لَا رَبِّ فِيهِ وَلَكِنَّ أَكْثَرَ

النَّاسِ لَا يَعْلَمُونَ ٢٦

“Jedhi, ‘Rabbumatu isin jiraachisee ergasii isin ajjeesa. Ergasii Guyyaa Qiyaamaa keessa walitti isin qaba. Isa keessa mamiin (shakkiin) hin jiru. Garuu irra hedduun namootaa hin beekan

.”” Suuratu Al-Jaasiyaa 45:26

Abbooti keenya fidaa jechuu malee raga biraan maal qabuu? “Eeti, isinii fi abbootin keessan Guyyaa Qiyaamama walitti qabamtu. Kanaafu hin muddaminaa.” Isaaniin jenna.

Toolee, karaalee shakkii Guyyaa Qiyaamama ittiin qulqulleessan ilaalun dura mee wantoota Guyyaa kanatti akka hin amanne sababa ta'an haa ilaallu. Wantoonni Guyyaa Qiyaamatti akka hin amanne sababa ta'an keessaa gurguddoona lama.

**Iffaa:** Badii ykn cubbuu raawwachu. Badii addaa addaa raawwachun qalbii gurraachessuun ragaa ifa bahaa akka hin argine nama taasisa. Qur'aana keessatti:

**“Guyyaa san kijibsiiftotaaf ee badii isaanii! Guyyaa Murtii kanneen kijibsiisaniif. Namni isa (Guyyaa Murtii) kijibsiisu hin jiru, daangaa darbaa, dillaawaa hunda malee. Yeroo keeyyattonni Keenya isa irratti dubbifaman, ‘Oduu warra duriiti.’ jedha. Haa dhoorgaman! Wanti isaan hojjataa turan qalbii isaanii haguuge.”** Suuratu Al-Muxaffifin 83:10-14

“Guyyaan Murtii (Qiyaamama) hin dhufu” jechuun kan morman namoota daangaa darbanii fi dillaawo malee eenyullee hin jiru. Namni kuni yommuu keeyyattonni (aayaatni) Rabbii isaaf dubbifaman, “**Oduu warra duriiti**” jedha. Dhugumatti, oduu warra duriiti miti. Haqa akka aduu ifa ta'eedha. Garuu qalbiin isaanii cubbuun ykn badiin waan haguugamteef haqa fi ragaa kana hin argan.

**Iffaa:** Addunyaa garmalee Jaallachuu- namni yommuu jirenya addunyaa tana garmalee jaallattu, waan zalaalami keessa turu itti fakkaata. Inuma Guyyaan Qiyaamama hin jiru jechuun morma. Qur'aana keessatti seenaa ajaa'iba suuratu al-Kahf:32-43 keessatti ni arganna. Seenaa san gabaabbinaa fi muraasa isaa yommuu ilaallu; namoota lamatu ture. Namtichi tokko kaafira, kan biraa immoo mu'mina (nama dhugaan amane). Namtichi kaafiraa ooyru inabaa (firii weeynii) lama qaba. Lamaan isaanitu mukkeen temiraatin kan marfamaniidha. Bishaan jidduu isaanii yaa'a. Ooyrun tunniin firii kennuu itti fufan. Homaa hin hanqisan. Yommuu ooyrun tunniin firii inabaa nama hawwisistu buustu, namtichi kaafiraa kuni namticha mu'minaatn akkana jedhe, **“Anatu qabeenyan si caala, gosaanis sirra jabaadha.”** (suuratu al-kahf:34) Dabalataan osoo lubbuu ofii miidhee jiru ooyru isaa keessa seenu fi qabeenya isaa ajaa'ibsifachuun akkana jedhe, **“Ishiin kuni gonkumaa ni baddii hin yaadu. Qiyaamanis ni dhaabbatti hin yaadu. Dhugumatti yoon gara Gooftaa kiyyaa deebifamee, iddoor deebii kan isa caalun argadha.”** (suuratu al-kahf:35-36)

Argitanii! Kaafirri akkamitti qabeenya fi jirenya addunyaa tanaan akkatti gowwoomu. Garuu dhumarratti, qabeenyi isaa kuni jalaa bade. Gaabbidhaan ganaa (shanacha) lamaan isaa gaggaragalchaa akkana jedhe, **“Yaa gaabbii koo! Odoo Gooftaa kiyyatti waa tokko dabaluu (qindeessu) baadhe maal qabaa!”** (suuratu al-kahf:42)

Kanaafu, namni qabeenya fi miidhaginna addunyaatin gowwoomun Guyyaa Qiyaamatti kafaru, dhumarratti ni salphata, hin milkaa'u. Dabalataanis seenaa Qaarun suuratu Qasas (28): 76-82 irraa dubbisuu dandeenya. Qaarun qabeenya baay'ee Rabbiin ni kenneef. Qabeenya Kanaan garmalee of

---

tuule, badii adda addaa raawwate. Dhumarratti, Rabbiin isaa fi iddo jirenyaa isaa dachiin akka liqimsitu taasise. Hanga fedhan qabeenya fi humnaa haa qabaatan, “**Edaa dhugumatti kaafiroonni hin milkaa'an.**” (Suuratu Qasas 28:82)

Akka dabalataatti, wantoota Guyyaa Qiyaamaa akka shakkan nama taasisan keessaa kan biroo, **beekumsa sirrii barbaadu dhiisu fi hojji gaggaarii hojjatan keessatti niyyaa Rabbiif qulqulleessu dhiisudha.**

### **Guduunfaa**

? Seenaa darbe caalaa ragaaleen, mallatoolee fi odeefannoон Guyyaa Qiyaamaa agarsisan baay'eedha.  
? Seenan tokko mallatoolee fi odeefannoо dhugaa qabaatee haqa ta'uу isaatti namni tokko yoo itti amane, seenaa san caalaa Guyyaa Qiyaamaa mallatolee, ragaalee fi odeefannoо dhugaa qabuttu maaltu amanuu isa dhoowwaa?

? Namni yommuu badii adda addaa raawwatu, “Guyyaan Qiyaamaa ni dhufa moo hin dhufu?” jechuun shakkitti lixa. Badii hojjachuu dhiisun shakkii qulqullessa, qalbii ibsa.

? Namni yommuu miidhaginna addunyaatin marfamu, zalaalami waan keessa jiraatu itti fakkaata. Inuma Qiyaaman hin jirtu jechuun morma.

? Beekumsa sirrii barbaadu dhiisu fi niyyaa Rabbiif qulqulleessu dhiisun wantoota Qiyaama akka shakkan nama taasisan keessaa tokko.

### **Date Created**

March 7, 2018

### **Author**

admin